



ДОМ НАРОДА

DOM NARODA

Broj:  
Sarajevo, 17. 4. 2026. godine

PARLAMENTARNA SKUPŠTINA  
BOSNE I HERCEGOVINE  
DOM NARODA

n/r predsjedavajućeg Doma naroda

BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO

17-04-2026

Organizaciona jedinica	Klasifikaciona oznaka	Redni broj	Broj priloga
02-	50-6-	1086/26	

Na osnovu čl. 154. i 158. Poslovnika Doma naroda Parlamentarne skupštine Bosne i Hercegovine („Službeni glasnik BiH“, br. 58/14, 88/15, 96/15, 53/16, 71/24 i 44/25), dostavljam sljedeće:

### DELEGATSKO PITANJE

Za Vijeće ministara i Ministarstvo sigurnosti Bosne i Hercegovine:

U kojoj je fazi postupak donošenja nove državne strategije nadzora nad opojnim drogama, sprečavanja i suzbijanja zloupotrebe opojnih droga u Bosni i Hercegovini, te kada se može očekivati da ona bude upućena u parlamentarnu proceduru usvajanja, u skladu s članom 7. Zakona o sprečavanju i suzbijanju zloupotrebe opojnih droga („Službeni glasnik BiH“, broj 8/06)?

#### Obrazloženje:

Usvajanje Državne strategije nadzora nad opojnim drogama, sprječavanja i suzbijanja zloupotrebe opojnih droga u Bosni i Hercegovini predstavlja prioritetan zadatak koji se direktno odnosi na očuvanje nacionalne sigurnosti, vladavinu prava i zaštitu javnog zdravlja svih građana. Trenutno stanje, u kojem je prethodni strateški okvir prestao važiti još 2023. godine, dovelo je do određenog institucionalnog vakuma koji ozbiljno narušava sposobnost države da sistemski i koordinirano odgovori na sve kompleksnije izazove narkokriminala. Zakon o sprečavanju i suzbijanju zloupotrebe opojnih droga jasno nalaže postojanje ovakvog dokumenta kao temelja za rad svih nadležnih institucija, a svaki dan bez važeće strategije produbljuje pravnu nesigurnost i slabi operativnu moć agencija za provođenje zakona.

Geostrateški položaj Bosne i Hercegovine na takozvanoj „Balkanskoj ruti“ čini našu državu nezaobilaznim tranzitnim koridorom za krijumčarenje različitih vrsta narkotika prema Evropskoj uniji, što sa sobom nosi ogroman rizik od jačanja lokalnih kriminalnih struktura i povećanja dostupnosti opasnih supstanci na domaćem tržištu. Strategija je jedini mehanizam koji može osigurati čvrstu i obavezujuću koordinaciju između Ministarstva sigurnosti, Granične policije, SIPA-e, te entitetskih i kantonalnih ministarstava unutrašnjih poslova. Bez precizno definisanih strateških ciljeva i akcionog plana, borba protiv organizovanog kriminala ostaje fragmentirana, a razmjena obavještajnih podataka s međunarodnim partnerima poput Europolja i Interpolja gubi na

efikasnosti, što direktno pogoduje kriminalnim grupama koje profitiraju na nedostatku sistemskog nadzora.

Pored sigurnosnog aspekta, usvajanje ovog dokumenta je neizostavan korak u procesu evropskih integracija budući da Evropska unija od Bosne i Hercegovine očekuje potpuno usklađivanje s modernim standardima nadzora nad drogama. Izostanak strategije ne samo da usporava naš evropski put, već nas direktno isključuje iz važnih regionalnih i međunarodnih inicijativa, ostavljajući naše institucije bez pristupa najsavremenijim metodologijama praćenja tržišta droga i ranog upozoravanja na pojavu novih, izuzetno opasnih sintetičkih supstanci.

Istovremeno, nova strategija treba ponuditi novi multidisciplinarni pristup koji povezuje represivni aparat sa sektorima zdravstva, obrazovanja, socijalne skrbi i drugim. Problem ovisnosti odavno nije moguće rješavati isključivo policijskim metodama. Samo jasna državna politika može osigurati da se resursi usmjere tamo gdje su najpotrebniji, čime se dugoročno smanjuje stopa kriminaliteta i rasterećuje pravosudni sistem.

DELEGAT



Kemal Ademi